

摩

訶

止

觀

摩訶止觀卷第七上

天台智者大師說

○第五識通塞者亦名知得失亦名知字非字如上
破法徧應通入無生若不入者當尋得失必滯是非
不得一向作解何者若同外道愛著觀空智慧宜以
四句徧破能破如所破今衆塞得通若不執觀空智
慧則能破不如所破但破塞存通如除膜養珠破賊
護將若爾卽大導師善知通塞將導衆人能過五百
由旬舊云六地見思盡爲三百七地八地爲四百九
地十地爲五百此義與釋論乖論以二乘爲四百二
乘之道非七地八地攝大乘人以三界爲三百方便

因緣兩生死足爲五百則攝義不盡更有有後生死
無後生死屬何百耶地人以十信住行向地爲五百
此與法華乖法華過三百由旬作化城此則二百由
旬作化城復有人解三界爲三百二乘足爲五百此
義三失一出三界外立化城云何二乘出三界外不
入城更行四百五百四百五百之外更無化城何所
可入而稱二乘二者滅化城方可得進城猶未滅而
輒進四百五百三者二乘共入化城云何聲聞爲四
百支佛爲五百有人以五住煩惱爲五百然二乘已
斷四住應是四百由旬外立化城有人以斷三界思
爲三百塵沙爲四百無明爲五百此亦不然由旬本

譬煩惱云何見多而不數思少爲三百此之名義本
出法華法華舉五百爲譬本以生死險道導師觀知
合之應作三番明五百乃會經耳一就生死處所二
就煩惱三就智慧諸師之釋方圓動息不與文會如
持一孔之匙開三須之鑰初家約通位就四百立化
城攝家約生死割二種於荒外地家約別位在界內
立化城次家徑誕不待開權卽自顯實人師過如此
釋論意云何論有二文初以二乘爲四百而止不作
五百後文以二乘爲一百今通之論明通意通家以
真諦爲極過三界已未破化城但入涅槃卽指涅槃
爲四百耳而復以二乘爲一百者更明出假菩薩從

空出假非涅槃爲一百入三界爲三百作如此消文
於經論無妨也今明五百由旬者一約生死處所謂
三界果報爲三百方便有餘土實報無礙土是爲五
百由旬處所次約煩惱者所謂見諦惑爲一百五十
分爲二百五上分爲三百塵沙爲四百無明爲五百
次約觀智者空觀智知三百假觀智知四百中觀智
知五百此與文會無前諸師過也又諸師判位遼遠
初心行人尚未斷見何由超過五百由旬乎今論由
旬有橫通塞有豎通塞橫者具約三法苦集爲塞道
滅爲通無明十二因緣爲塞無明滅爲通六蔽覆心
爲塞六度爲通豎通塞者見思分段生死爲塞從假

入空觀爲通無知方便生死爲塞從空入假觀爲通
無明因緣生死等爲塞中道正觀爲通今當以橫織
豎檢校通塞如從假入空破諸見思單復具足無言
等見九凡八十一思如斯諸惑本是汙穢增長煩惱
遮塞行人那忽取著謂是謂非起諸結業漏落生死
唯見苦集不見道滅既不識見思中四諦是自不知
名爲無明乃至老死但構因緣無明不滅不滅故堅
著叵捨唯在此岸不到彼岸大經云童子飢時取糞
中果智人呵之赧然有愧失於淨法是名爲塞若於
諸見介爾起心知無性實無常無主倒破則無業無
業則無果是名爲道道故有滅若識四諦則無無明

亦無老死因緣壞故則捨諸有到於彼岸當用此意
歷一一心歷一一能歷一一所若起三塞破之令通
若是三通養令成就復次體見卽空能體亦卽空如
羅漢之心尚名無漏五陰我觀未真那得非陰若計
陰實則結業生死若不識陰四諦卽是無明若愛觀
空智慧則不能捨用卽空意歷一一心歷一一能歷
一一所若有三塞破之令通若是三通養令成就則
巧過見思之塞善通三百由旬也次用橫織豎檢校
從空入假觀通塞者此則易解於病法藥法授藥法
於一一法一一能一一所明識諦緣度若起三塞破
之令通若有三通養令成就則過無知之塞通四百

由旬次用橫織豎檢校中道正觀者於無明法性真緣等一一法一一能一一所明識諦緣度若起三塞破之令通若有三通養令成就則過無明之塞通五百由旬若作如此論通塞者次第豎論六地初地動經劫數塞乃得通大經云須陀洹者八萬劫到乃至支佛十千劫到到菩薩初發心住此論聖位何益初心行人者乎復次約橫別論通塞者如大品經云有菩薩從初發心卽與薩婆若相應者與空相應也若初未相應當用諦緣度檢一一心若有三塞破之令通若有三通養令成就得過三百由旬又云有菩薩從初發心卽能遊戲神通淨佛國土此是出假之意

若初發心脩假亦用諦緣度檢一一心破塞着通過
四百由旬又云有菩薩從初發心卽能坐道場成正
覺此卽中意若初發心脩中亦用諦緣度檢一一心
破塞着通過五百由旬也如此說者雖初心得論通
塞而三法各別大論引三喻一則步涉二則乘馬三
則神通步馬兩行須知通塞神通無礙塞不通遮山
僻皆虛何通可擇初觀喻步次觀喻馬後觀喻飛三
義分張亦非今所用也若豎論三觀兩觀當地爲通
望上爲塞若後一觀勝下爲通隔小爲塞橫論三觀
當分爲通不相收爲塞法相淺深住有通塞况復於
中起苦集無明蔽等是故皆塞無復有通若一心三

觀法相卽破豎中之通塞三觀一心破橫中之通塞
空卽三觀故破步涉山僻三百之通塞假卽三觀破
乘馬四百之通塞中卽三觀破神通之通塞良以一
心能卽空假中者一切山河石壁衆魔羣道皆如虛
空一心三觀遊之無礙終不去下陵高避山從谷觸
處諸塞皆通無礙能過五百由旬到於寶所是名爲
通通本對塞旣觸處如空則無復有塞無塞則無通
若於無塞無通起苦集無明障蔽者非但失於神通
亦失馬步能破如所破字爲非字如彼蟲道偶得三
觀之名是蟲不知是字非字若於一一法一一能一
一所皆卽空卽假卽中具諦緣度是名無通無塞變

照通塞是爲智者識字非字亦名良醫知得病處
無生門明識通塞者於餘法門亦如是是爲初心過
五百由旬應明六卽義云問通塞得失字非字爲一
爲異答此是一意種種說耳亦有差別通塞約解得
失約行字非字約教金光明云正聞正聽正分別正
解於緣正能覺了知字非字是正聞正聽知得失是
正分別正解於緣知通塞是正能覺了雖此差別同
顯一致耳問橫塞塞豎通不豎塞塞橫通不橫通通
豎塞不豎通通橫塞不答一往然二往不然然者無
明卽見息何意非橫障中智治一切何不通橫塞此
是一往然義耳若二往釋者橫塞障近不能塞豎通

橫通力弱不能通豎塞豎塞深遠不作橫障豎通對
當別不通於橫塞耳○第六明道品調適者道品有
四一當分二相攝三約位四相生一明當分者未必
具品方能得道三四二五單七隻八當分是道故云
當依念處得道又云是道場又云是摩訶衍念處既
爾餘品亦是爲當分道品而非調停也二明相攝
者如念處一法皆攝諸品引釋論文云念處既攝餘
品餘品亦攝念處是爲相攝道品亦非調停也三約
位者如念處當其位正勤是煖位如意足是頂位五
根是忍位五力是世第一位八正是見諦位七覺是
脩道位此是約位亦非調停也四相生者如脩念處

能生正勤正勤發如意足如意足生五根五根生五力五力生七覺七覺入八正道是爲善巧調適戒定慧等皆名爲正清淨心常一則能見般若若是爲相生亦是調適所以須此者上來雖破法徧識通塞若不調停道品何能疾與真法相應真法名無漏道品是有漏有漏能作無漏方便方便失所真理難會如釀酒法醱煖得宜變水成酒麴蘖失度味則不成大論云三十七品是行道法涅槃城有三門三門是近因道品是遠因爲是義故應須道品調停也問道品是二乘法云何是菩薩道耶荅大論呵此問誰作是語三藏摩訶衍皆不作是說那得獨云是小乘法淨名

云道品善知識由是成正覺道品是道場亦是摩訶
衍涅槃云能脩八正道者卽見佛性名得醍醐大集
云三十七品是菩薩寶炬陀羅尼如此等經皆明道
品何時獨是小乘若大經云三十七品是涅槃因非
大涅槃因無量阿僧祇助菩提法是大涅槃因者道
品之外無別有道品如四諦外無第五諦一種苦集
如爪上土分別苦集有無量相如十方土直明一二
十七品是涅槃因復有無量三十七助道品名大涅
槃因云何無量有四種道諦故有十六門故又有漏
道品欲界二十二未到三十六初禪三十七皆有漏
道品如乳三藏道品如酪通教道品如生蘇別教如

熟蘇圓教如醍醐大經之文義合於此非道品外別
有助法也或言三十七品是助道或言是正道大論
云是菩薩道此文似正也淨名云道品善知識由是
成正覺此文似助也又若言三十七品是有漏者云
何言七覺是脩道法華云無漏根力覺道之財云何
八正在七覺前此應三句分別一三十七品皆有漏
二皆是無漏三亦有漏亦無漏如大論云脩八正道
得初善有漏五陰善有漏五陰卽是煖法煖法之前
向得脩於八正道云何脩邪初從師受法繫心憶念
名念處爲求此法勤而行之名正勤一心中脩名如
意足五善根生名根根增長名力分別道用名七覺

安隱道中行名八正道能如是脩得善有漏五陰當知道品皆是有漏皆是無漏者卽是見諦思惟所行道品一向是無漏法華之文意在此也從來雖言有漏中得脩八正七覺等未有文證而毗婆沙云若入正在七覺後亦得是有漏亦得是無漏何以故依八正入見諦卽是亦無漏若八正在七覺前一向是無漏此則可解引婆沙文證成二意又亦漏無漏卽是對位意也諸道諦三十七品今不具記但明無作道諦三十七品成於一心三觀義也大品云欲以一切種脩四念處者念處是法界攝一切法一切法趣念處是趣不過華嚴云譬如大地一能生種種芽地是

諸芽種也法華云一切種相體性皆是一種相體性
何謂一種卽佛種相體性也常途云法華不明佛性
經明一種是何一種卉木叢林種種喻七方便大地
一種卽一實事名佛種也今一念心起不思議卽一
切種十界陰入不相妨礙若觀法性因緣生故一種
一切種則一色一切色若法性空故一切色一色則
一空一切空法性假故一色一切色一假一切假法
性中故非一非一切雙照一一切亦名非空非假雙
照空假則一切非空非假雙照空假九法界色卽空
卽假卽中亦復如是是名身念處若觀法性受法性
因緣生故一種一切種一受一切受法性受空故一

切受一受一空一切空法性受假名故一受一切受
一假一切假法性受中故非一受非一切受非空非
假雙照空假則一切非空非假雙照空假九法界受
卽空卽假卽中亦復如是是名受念處若觀法性心
因緣生法一種一切種一心一切心法性空故一切
心一心一空一切空法性假故一心一切心一假一
切假法性中故非一非一切非空非假雙照空假九
法界心亦復如是是名念處若觀法性相行兩陰
因緣生法一種一切種一行無量行法性空故一切
行一行一空一切空法性假故一行一切行一假一
切假法性中故非一非一切非空非假雙照空假一

切非空非假雙照空假九法界行皆卽空卽假卽中
亦復如是是名法念處如是念處力用廣博義兼大
小具破八倒雙顯榮枯雙非榮枯卽於中間入般涅槃
榮亦名坐道場亦名摩訶衍亦名法界兼廣義其
相云何法性之色實非是淨而凡夫橫計爲淨是名
顛倒實非不淨二乘之人橫計不淨是名顛倒今觀
色種卽空一切卽空空空中無淨云何染著是名凡夫
計淨倒破枯念處成色種卽假一切皆假分別名相
不可窮盡假智常淨不爲無知塵惑所染云何滯空
而取灰滅言色不淨是名二乘不淨倒破榮念處成
是名八倒俱破枯榮雙立觀色本際非空非假則一

切非空非假非空故非不淨倒非假故非淨倒非淨
倒故則非榮樹非不淨倒故則非枯樹非枯非榮則
非二邊無邊無中乃名中間佛會此理故名涅槃亦
是非淨非不淨八倒不生名爲涅槃如是涅槃名秘
密藏安置諸子秘密藏中佛自住中故言入也法性
之受本非是樂而凡夫之人橫計爲樂是名顛倒實
非是苦二乘之人橫計爲苦今觀受種卽空一切皆
空空無樂何云生染則凡夫倒破枯念處成受種
卽假一切皆假以無所受而受諸受名聞分別不生
厭畏云何棄之沉空灰斷二乘倒破榮念處成是名
二倒雙破枯榮雙立觀受本際卽非空非假非空故

非枯非假故非榮邊倒不生名爲涅槃中間理顯名
祕密藏皆如上說云法性之心本非是常凡夫橫計
是名常倒法性實非無常二乘橫計無常今觀心種
卽空一切卽空空中非常云何謂心心念念相續是名
凡夫常倒破枯念處成心卽假名一切悉假心若無
常那得分別無量心相是名二乘無常倒破榮念處
成又心卽非空非假非空故非無常非假故非於常
非榮非枯邊倒不生名入涅槃中道理顯名祕密藏
安置諸子自亦入中云法性之法本非有我凡夫之
人橫計有我本非無我二乘之人橫計無我今觀法
性卽空一切皆空空中無我是名凡夫倒破枯念處

成法性卽假一切皆假施設自在不滯我義具足是
名二乘倒破榮念處成觀法本際卽非空非假非空
故非無我非假故非於我邊倒不生名入涅槃中間
理顯名祕密藏治倒法藥其數有四法性觀智名之
爲念一諦三諦名之爲處一切卽空諸倒榮枯無不
空寂一切卽假二邊雙樹無不成立一切卽中無非
法界祇一念心廣遠若此若能深觀念處是坐道場
是摩訶衍是雙樹閒入般涅槃始終具足不須更脩
餘法若不入者更研餘品動觀念處名正勤見思本
起名已生惡觀於卽空令已生不生故勤精進塵沙
無明名未生惡觀卽假卽中令未生不生故勤精進

竭力盡誠行四三昧遮此二惡一切智名已生善此
善易生故言泥洹道易得也道種智一切種智名未
生善此分別智難生空智已生勤加增長中智未生
令得開發三觀無間祇爲生此二智耳是四正勤亦
能悟道故言一心勤精進故得三菩提不須餘法若
不入者當是不勤心過散動須入善寂審觀心性名
爲上定於上定中脩如意足欲精進心思惟欲者專
向彼法亦名莊嚴彼法定中觀智如密室中燈照物
則了以照了故斷行成就脩如意足精進者成就彼
法法性不動而寂然精進無間無雜斷行成就脩如
意足心者正住觀察彼法一心中緣制之一處無事

不辦斷行成就脩如意足思惟者善能分別彼法方便如此思惟不令動散定思惟故斷行成就脩如意足能如此脩定心而入不須餘法若不入者當脩五根信三諦理是三世佛母能生一切十力無畏解脫三昧但念處脩不求餘法是名信根進者以信攝於諸法信諸法故倍策精進念者但念正助之道不令邪妄得入又此法者爲精進所脩是法不忘故名念根定者一心寂定而行精進又此法爲念所攝是法不忘不動故名定根慧者念處之慧爲定法所攝內性自照不從他知是名慧根但脩五根亦能入道成摩訶衍若不入者進脩五力令根增長遮諸煩惱名

之爲力信破諸疑無能動者精進除懈怠如本所願
皆得成就念破邪想不爲煩惱所壞定破散亂遠離
憊開雖有所說不礙初禪善住覺觀不礙二禪心生
歡喜不礙三禪教化衆生不礙四禪妨四禪法不妨
諸定亦不捨定亦不隨定是名定力慧破邪執一切
執一切慧雙照具足是名慧力如是五力名摩訶衍
若不入者用七覺均調心浮動時以除覺除身口之
麤以捨覺捨於觀智以定心入禪若心沈時精進擇
喜起之念通緣兩處脩此七覺卽得入道大論云若
離五蓋專脩七覺不得入者無有是處若不入者脩
八正道更以出世上上正見觀三諦理以正思惟發

動此觀如法相說自他俱益卽是正語若黑業得黑
報白業得白報雜業得雜報非白非黑業得非白非
黑報約小乘作可解今言沉空是黑業出假是白業
兩兼是雜業中道是非白非黑業皆名邪命若業能
盡業名爲正業依此而行名爲正業正業不爲二邊
所牽見他得利心不惱熱而於已利常知止足是爲
正命善入正諦名正精進心不動失正直不忘名正
念正住決定名正定因是八正道卽得入理大經云
若有能脩八正道者卽得醍醐如八道品非是對位
但於初心觀法性理卽得具足大論云四念處中四
種精進名四正勤四種定心名四如意足五善根生

名爲根根增長名爲力分別四念處道用名爲覺四
念處安隱道中行名八正道故知初心行道用三十
七品調養止觀四種三昧入菩薩位如此道品是大
涅槃近因餘諸道品名爲遠因云今以譬顯此義殖
種於地芽觔初開生根下向枝葉上布其花敷榮結
果成實法性法界爲大地念處觀爲種子四正勤如
抽芽五根如生根五力如莖葉增長七覺如開花八
正如結果結果者卽是入銅輪位證無生忍亦名至
寶所亦名入秘藏亦名得醍醐亦名見佛性亦名法
身顯八相作佛道品善知識由是成正覺此之謂也
若通途釋道樹者如大品明離三惡道名葉益得人

天身名花益得四道果名果益此偏就空爲釋耳免
二乘地爲葉益得變通身爲花益具道種智爲果益
此偏就假爲釋耳免二邊縛爲葉益受法性身爲花
益證入佛性爲果益此偏就中爲釋耳若惣就三觀
者卽空名葉益卽假名花益卽中名果益云復次行
三十七道品將到無漏城城有三門若入此門卽得
發真謂空無相無作門亦名三解脫門亦名三三昧
若從正見正思惟入定從定發無漏是時正見智名
大臣正定爲大王從此得名名三三昧非智不禪卽
此意也若由正定生正見從正見發無漏是時正定
爲大臣智慧爲大王從此得名名三解脫非禪不智

卽此意也或可三昧是伏道解脫是斷道證道或可
定慧合故三昧卽解脫解脫卽三昧若三藏以苦下
空無我是空門滅下四行是無相門集道下八行苦
下兩行是無作門此十六行王臣等云若通教明苦
集皆如幻化卽空門古釋論本云若觀極微色則有
十八空今本云若觀一端疊則有十八空疊是假名
極微是實法以此爲異若得意者假實皆空耳若未
入空情想戲論計有空相知空無空相名無相門空
相雖空猶計觀智旣無能所誰作空觀是名無作門
旣無作者誰起願求亦名無願此三三昧王臣云若
別教明從假入空證真諦名空三昧二乘但證此空

猶有空相菩薩知空非空出假化物無復空相是名
無相三昧進脩中道無中邊相亦不求中邊名無作
三昧此三觀智王臣云復次別約出假意者分別無
量藥病悉是假名假名無實無實故空是名空門空
尚無空相况有假相故名無相門空假無相亦不願
求知病識藥故名無願此出假智王臣云別約圓者
名雖同前意義大異大論云聲聞緣空脩三解脫菩
薩緣諸法實相脩三解脫智者見空及與不空此空
不空亦名中道若見此空卽見佛性又二乘觀夢中
十八事夢中內事不可得名內法空夢外事不可得
名外法空乃至夢中十八有不可得名十八空今圓

觀眠法可不得無內法從眠所生一切內法皆不可
得名內法空一切法趣此內空眠無外法從眠所生
一切外法不可得卽外法空一切法趣此外空乃至
眠法十八種有不可得名十八空一切法趣十八空
歷十八緣名十八空但是一空方等云大空小空皆
歸一空一空卽法性實相諸佛實法大品云獨空也
如前觀無明四句不可得一空一切空不見四門分
別之相非緣非真無誰所作王臣云如是空卽無相
無作及一切法一切法亦如是當知一解脫門卽三
解脫門三解脫門卽一門又四門中皆脩三解脫互
無障礙如此三門意非次第別雖次第皆緣實相又

異通教通緣空理復異三藏三藏緣四諦智故知三
脫及與道品節節有異須善識之又華嚴日出先照
高山偏多四榮鹿苑三藏偏多四枯方等般若多調
枯以入榮引小而歸大鶴林施化已足於榮枯中間
而入涅槃爲極鈍難化來至雙樹始復畢功利根明
悟處處得入如身子等於法華中入秘密藏得見佛
性所以涅槃遙指八千聲聞於法華中得記作佛如
秋收冬藏更無所作約此一番施化早畢不俟涅槃
又云誰能莊嚴娑羅雙樹卽舉舍利弗六人又別舉
如來若見佛性能莊嚴雙樹於其中閒而入涅槃身
子六人既能莊嚴豈不見佛性於其中閒入於涅槃

聲聞尚爾諸菩薩等處處得入其義可知若入涅槃
成五解脫不卽六法不離六法三佛性意云○第七
助道對治者釋論云三三昧爲一切三昧作本也若
入三三昧能成四種三昧根利無遮易入清涼池不
須對治根利有遮但專三脫門遮不能障亦不須助
道根鈍無遮但用道品調適卽能轉鈍爲利亦不須
助道根鈍遮重者以根鈍故不能卽開三解脫門以
遮重故牽破觀心爲是義故應須治道對破遮障則
得安隱入三解脫門大論稱諸對治是助開門法卽
此意也夫初果聖人無漏根利見理分明事中煩惱
猶有遮障不名善人斯陀含侵五下分亦非善人雖

非善人實非凡夫若世智斷惑雖無事障實非聖人
如此兩條尚須助道况根鈍遮重而不脩對治云何
得入助道無量前通塞意中約六蔽明遮宜用六度
爲治以論助道若人脩四三昧道品調適解脫不開
而慳貪忽起激動觀心於身命財守護保著又貪覺
緣想須欲念生雖作意遮上而慳貪轉生是時當用
檀捨爲治脩三昧時破戒心忽起威儀麤穢無復矜
持身口乖違觸犯制度淨禁不淳三昧難發是時當
用尸羅爲治脩三昧時瞋恚怒常生忿恨惡口兩
舌諍計是非此毒障於三昧是時當脩忍爲治脩三
昧時放逸懈怠怠恣身口意縱蕩閑野無慙無愧不能

苦節如鑽火未熟數數而止事億之人尚不辦世務况三昧門是時應用精進爲治脩三昧時散亂不定身如獨落口若春蛙心如風燈以散逸故法不現前是時應用禪定爲治脩三昧時愚癡迷惑計著斷常謂有人我衆生壽命觸事面牆進止常短不稱物望意慮頑拙非智點相是時當用智慧爲治諸蔽覆心亦有厚薄薄者心動身口不必動厚者身口動心必先動內病旣強其相外現若用對治得去是病所宜若對治不除當依四隨廻轉助道如治一慳或樂脩檀或不樂脩檀或善心生或不善生或脩檀慳破或不破或脩檀助開或不開當善巧斟酌或對或轉或

兼或第一義云脩餘治亦如是於助六度但作一事
解不能助道當觀此助不思議攝一切法如後說有
人言說六通教說十通宗此不應爾大經明六
度是佛性大品云是摩訶衍一度尚攝諸法何況六
耶若得開合之意則無去取如禪有願智力開出泥
滓波羅蜜有神通力開出婆羅波羅蜜定守禪度也
般若有道種智開出漚和俱舍羅又有一切種智開
出闍那波羅蜜一切智守本受般若之稱離則爲十
束卽爲六豈得以廣絡而判大小耶今明六度助道
攝諸法盡略明攝諸道品調伏六根十力四無所畏
十八不共法六通三明四攝四辯陀羅尼三十二相

八十隨形好等及一切法云何攝諸道品諸道品中各有捨覺分正爲檀攝若三藏捨覺分雖不入理亦是捨身命財大論云慈悲喜於衆生有益捨何所益捨能具足六度廣利衆生是名大益又捨如膏油能增五度光明故知檀度攝捨覺分也若通教捨覺分捨身命財如幻如化三事皆空此捨覺分亦爲檀度所攝也若別教捨覺分捨身命財中無知此捨亦爲檀度所攝也若圓教捨覺分捨十法界色身捨十法界連持之命捨十法界依報如是身命財皆不入三邊何以故財名六塵若計六塵可捨有前人可與已身能施如此施者卽入六塵有邊若三事皆空卽墮

無邊今觀財卽空不入有觀財卽假不入空不二之
捨與生死後際等離老病死得不壞常住有邊是生
死屬前際空邊是涅槃屬後際是二皆空悉不可得
故稱爲等離老死者前際空故離分段老死後際空
故離變易老死二死永免故言離也得不得壞常住者
卽是中道法性諸佛所師以法常故諸佛亦常此常
住財無能毀損常住之身無能繫縛常住之命不可
斷滅成就究竟檀波羅蜜以自莊嚴故金剛般若云
初中後日分悉以恒河沙身布施不如受持般若一
四句偈當知理觀圓捨乃會道品檀度所攝也如此
道品捨覺分理觀深微而不存事行三藏中事施雄

猛利燈救質國城妻子而理觀全無毫末兩皆有過
今明事檀助破慳蔽進成理觀豈可相離若人雖解
實相圓捨之觀撫臆論行涉事慳克保護財物一毫
不捨辭憚勞苦稱筋計力不能屈已成他貪惜壽命
豈能諍死讓生觸事恪著鏗然不動但解無行如是
重蔽何由可破三解脫門何由可開今於道場苦到
懺悔生決定心起大誓願捨身命財決無愛惜自行
此檀又以教他讚歎檀法隨喜檀者立此誓已稱十
方佛爲證爲救心若真實無欺誑者能感如來放檀
光明照除慳蔽息益等_云以蒙光故與諸道品捨覺
相應須一一釋出之事理旣圓能畢竟檀捨財同糞

土身比毒器命若行雲棄三如唾怪障旣破治道義
成便得解脫若無因緣寄之行道應有利益捨若遺
芥是爲事油助增道明開三脫門得見佛性若不能
爾無助治之益若如上脩卽應得悟設不悟者應自
息惟理觀道品有正業正語正命此屬尸羅所攝若
三藏正業等乃是慎護威儀不破不缺不穿不雜通
教正業等不得身口卽事而真乃是隨道無著等戒
別教正業等乃是智所讚自在等戒圓教正業等皆
觀法性卽是具足等戒淨名云其能如此是名奉律
卽此意也理觀之戒卽心而備雖作此解身口多虧
或今生麤穢或先世遮障未得懺悔覆我三昧脫門

不開息是事已當自悲愍深生改革從今日始斷相續心誓持禁戒事無瑕玷護持愛惜如保浮囊終不全身而損戒也毒龍輪皮全蟻須陀摩王失國獲偈自戒化他讚法讚者大誓不動稱佛名字爲證爲救心誠感佛放淨戒光能令毀禁者淨戒光觸時二世罪滅卽與理觀正業相應一一須釋出之事理旣圓畢竟持戒入三脫門見於佛性是名助油以增道明如上脩戒若不入者當復思惟是諸道品各有念根念力念覺分正念等卽是忍義羣提所攝若三藏正念等是伏忍通教正念等是柔順忍別教正念等是無生忍圓教正念等是寂滅忍若人念力堅強瞋恚

之賊則不得入而得入者或因無念或念不强而瞋
蔽得起或今世起或前世起或瞋同行外護或瞋現
事或追緣昔嫌或初起屑屑或初卽隆盛若恣瞋毒
傾蕩無遺設不自在如蛇自齧瞋障百千法門豈得
恣之而不呵責當知但有理解未有忍力旣知是已
深生改悔發大誓願卑如江海穢濁歸之屈如橋梁
人馬踐之當耐勞苦猶如射梁衆箭湊之無恨無怨
如富樓那被罵喜免手乃至被刃喜疾滅無辜惱者
忍力轉盛如揩金磨鏡羈提仙人強輒具安自忍化
他讚法讚者大誓不動稱十方佛爲證爲救佛放忍
光二世瞋障重罪銷滅得與事理諸念相應於諸違

境忍力成就是爲事油助增道明若如上脩而不入者當復思惟四種道品各入精進爲毗梨耶所攝大論云前三易成不須精進後二難成必須精進精進故得三菩提阿難說精進覺佛卽起坐如大施杼海乃可相應而今放逸倚卧縱緩忘失本心無復進力雖在道場雜諸惡覺名之爲汗日不如日名之爲退退則非進汗則非精何能契理或先世懈怠罪障覆心如穴鼻無鈎狂醉越逸初中後夜不克已競時違復遷延穠度日月當發誓願刻骨銘心身命許道推死在前無量劫來唐愛護惜今求三昧決定應捨以夜繼晝呵責過患行法匪懈端直其身無復難心苦

心設有病惱不以爲患一生不尅歷劫不休自進化
他讚法讚者稱十方佛爲證爲救感佛進光得與理
觀八進相應若與三藏相應卽成生生精進通相應
卽成生不生精進別相應卽成不生生精進圓相應
卽成不生不生牢強精進開涅槃門見於佛性是爲
事油助增觀明精進有通體別體云若如上脩不得
悟者當自思惟理觀道品各有八定爲禪度所攝但
是解心實未證得雖言根本事定不成乃至雖言無
作定首楞嚴不成若無定者平地顛墮或二世散動
三昧不開爲是義故一心決果初中後夜身端心寂
疲苦邪想若起疾滅自禪教他讚法讚者大誓不動

盡命爲期乃至後世不證不止稱十方佛爲明爲救
感佛定光散動障破事禪開發與四觀相應大論釋
禪度先列諸禪法次明無所得顯波羅蜜相後廣釋
九想八念等皆於禪中開出諸禪法甚多今但取五
門爲助道也若禪息時心多覺觀徧緣三毒當用數
息爲治數若不成卽知心去去卽追還從初更數防
散錄心此爲良治以心住故或發欲界定乃至七依
定皆能入若不得般若方便成凡夫法若得方便成
摩訶衍故請觀音云若數息心定毛孔見佛住首楞
嚴得不退轉是爲數息開解脫門卽與三藏八定相
應乃至與無作八定相應是爲事油助增道明若緣

女色耽洎在懷惑著不離當用不淨觀爲治觀所愛
人初死之相言語適爾奄便那去身冷色變蟲膿流
出不淨臭處穢惡充滿捐棄塚間如朽敗木昔所愛
重今何所見是爲惡物令我憂勞旣識欲過婬心卽
息餘八想亦治婬欲大論云多婬者令觀九想於緣
不自在令觀背捨緣不廣普令觀勝處不能轉變令
觀十一切處若有怖畏令脩八念皆以不淨爲初門
悉治婬火開解脫門與四種八定相應助油增明
若攀緣瞋恚當用慈心爲治上忍度是通治今別約
慈無量心餘三心或是樂欲等悲無量爲對治者
緣衆生苦深起愍傷欲拔其苦緣此心入定與悲相

應慈者想衆生得樂緣此心入與慈定相應喜心者
想衆生得樂生大歡喜緣此心入與喜定相應捨心
者捨愛增想住平等觀緣此心入與捨定相應得此
四定者於諸衆生瞋無從生下更廣說若攀緣邪倒
當用因緣觀治之毗曇以界方便破我今因緣破我
三世破斷常二世破我一念破性此定若成卽與理
觀相應助開涅槃門若睡障道罪起卽用念佛觀治
之緣於應佛無相之相緣相分明破障道罪見十方
佛與理觀相應開涅槃門若如上脩而不入者或非
其宜當自思惟理觀之中具四念處慧根慧力擇喜
覺分正見正思惟如是十法智度所攝此是理觀此

解不明由於二世愚癡迷僻昏覆精神故令三昧不顯應當改革發大誓願令事觀明了破四顛倒諦觀此身從頭至足但是種子不淨乃至究竟五種不淨所謂是身攬他遺體吐淚赤白二諦和合託識其中以爲體質是名種子不淨居二藏間穢濁浹潤乍懸乍壓或熱或冷七日一變十月懷抱若六胞成就形相具足日月已滿轉向產門大論云此身非化生亦非蓮華生但從尿道出此處卑猥底下廝惡是名住處不淨既生出已眠卧糞穢乳哺將養自小之大耳貯結睜眼流眵淚鼻孔垂膿口氣常臭頭垢重沓如薄糞泥胗腋酸汗如淋尿灑衣服著體卽如油塗是

名自相不淨其中唯有屎尿之聚膿聚血聚膏髓等
聚大腸小腸肪膈腦膜筋纏血塗惡露臭處蟲戶所
集盡海水洗不能令淨論云此身不如摩羅延山能
出旃檀自小至大性是不淨譬如糞穢多少俱臭是
名自性不淨一旦命終假借還本風去火冷地壞水
流蟲噉鳥啄頭手分離盈流於外三五里閒逆風聞
臭惡氣腥臊衝人鼻息惡色黥瘡汗人眼目劇於死
狗是名究竟不淨如是五種皆是實觀非得解觀那
忽於中計以爲淨好衣美食愛護將養摩頭拭頸保
此壽身譬如蟻垤九鹿糞穢人亦如是愛重此身至
死不厭不可搪觸養此身故造種種罪若知過患始

終不淨能破淨倒也又復當知四大成身二上二下
互相違迤地遏水水爛地風散地地遮風水滅火火
煎水更相侵害如篋盛四蛇癰瘡刺箭常自是苦有
何可樂加以飢渴寒熱鞭打繫縛生老病死是爲苦
苦四大相侵互相破壞是爲壞苦念念流炎是爲行
苦於下苦中橫生樂想若見苦相分明如瘡中刺介
介常痛不於此身生一念樂倒又復當觀過去無明
善惡諸業驅縛心識偈入胎獄如繫鳥在籠欲去不
得心識亦爾籠以四大繫以得繩心在色籠無處不
至業繩未斷去已復還籠破繫斷卽去不反空籠而
存此壞彼成出籠入籠印壞文成無一念住又風氣

依身名出入息此息遷謝出不保入毗曇云命是非色非心法大集云出入息名壽命一息不返卽名命終比丘白佛不保七日乃至不保出入息佛言善哉善脩無常又觀諸業猶如怨家如烏競肉經云刹那起惡殃墜無間促促時節尚成重業何況長夜惡念業則無邊業如怨責常伺人便若正償此責餘業不牽償稍欲畢餘業爭撮去住無期無常殺鬼不擇豪賢危脆不堅難可恃怙云何安然規望百歲四方馳求貯積聚斂聚斂未足溘然長往所有產貨徒爲他有冥冥獨逝誰訪是非或出家人知解溢胷或精進滅火而不悟無常諺云可憐無五媚精進無道心此

之謂也若覺無常過於暴水猛風掣電山海空而無
逃避處如此觀已心大怖畏眠不安席食不甘哺如
敗頭然白駒烏兔日夜奔競以求出要豈復貪著世
財結構諸有作無益事造生死業耶頓絕羈鎖超然
直去如野于絕透爭出火宅早求免濟是爲破常倒

摩訶止觀卷第七上終

摩訶止觀卷第七下

天台智者大師說

又復當觀無量劫來多約名色及以想行而計我人若其執作忽聞讚罵云讚罵我立行住坐臥一切事物皆計於我如膠塗手隨執隨著經云凡夫若離我心無有是處若遭貧窮失於本心亦計我不息若得富貴恣勢縱毒酷害天下赫怒隆盛怨枉無辜諸業興起皆我所爲誰代當者逆風執火豈不燒手如彼夜房謂言有鬼天明照了乃本舊人又無智慧故計言有我以慧觀之實無有我我在何處頭足支節一諦觀了不見我何處有人及以衆生業力機關假

爲空聚從衆緣生無有宰主如宿空亭二鬼爭屍如此觀時我倒休息若修四觀破四顛倒道心鬱起生大怖畏如爲怨逐如叛怨國如行險道念念周憶祇求出路聲聞獵圍霍驚絕走雖遇水草何暇飲噉志在免脫聲聞如是若鹿透圍小得免難並馳並顧悲鳴哽咽痛戀本羣雖復踟躕更知何益茹氣吞聲銜悲前進緣覺如是自出生死愍念衆生雖悲悼哀傷不能救援若大象王雖聞圍合不忍獨去自知力大堪遮刀箭守護其子令羣安隱得免傷害菩薩如是無常無我諸觀明時恠畏切心如蹈水火又起慈悲如母念子衆生盲冥不覺苦燒我今云何棄之獨去

安耐生死以智方便教化淳熟作得度因緣於自功德法身慧命展轉增長有緣機熟卽坐道場成佛與衆生共出三界如彼大象自他俱安若小象子雖捍刀箭必爲所中自他無益初心菩薩欲入生死生死觸之失退善根法身破壞雖然發大悲心功德可歎故菩薩雖怖生死而恒求善本荷負衆生不同二乘雖住生死非貪五欲但爲兼濟不同凡夫經云不住調伏不住不調伏雖知無我而誨人不倦雖知涅槃而不永滅雖知不淨不說厭離卽此義也多修六度功德善本似羊身肥勤觀無常諸惡業壞恒被狼怖如羊無脂是名修事般若相自行教他讚法讚者稱

十方佛爲證爲救諸佛威加離障解脫卽與四種十
慧相應是爲事油助增道明云若全無理觀又無事
懺輒望佛印希利規名若佛印者無有是處若理觀
無閒借事破蔽真實心懺印有是處所以須事助道
者如二萬億佛所繫珠中忘大乘卽不以大化更六
百劫以小起之令怖畏生死漸向父舍故知應借小
助大又佛初欲大化諸佛不印若思方便卽稱善哉
如富家子病應用黃龍湯父母豈惜好藥宜強之耳
服已病差佛有本願令衆如我豈惜大乘事不獲已
逗機對治助道開門義亦如是問曰不修助道三昧
不成六度應勝道品耶荅此有三句六度破道品道

品破六度六度修道品道品修六度六度卽道品道
品卽六度如上道品不能契真若修六度卽能破蔽
豈非六度破道品有時六度不能到彼岸若脩道品
卽得悟入是爲道品破六度若修六度先破六蔽進
脩道品住運可成是爲六度修道品如上所說卽是
道品修六度六度道品相卽者檀卽摩訶衍四念處
亦卽摩訶衍檀與道品無二無別不可得故通論諸
法於行無益互有相破於行有益互有相修約理互
有相卽若四諦因緣有無非有無廣立一切法皆有
三番若得此意自在說云云何六度攝調伏諸根義
若六根不受六塵卽合諸道品中捨除覺分卽是檀

度調伏諸根也六根不爲六塵所傷卽合道品正業
正語正命卽是戒度調伏諸根也違情六塵安忍不
動卽合道品四種之念是名忍度調伏諸根也守護
根塵常不懈怠卽合道品八種精進是名進度調伏
諸根定心不亂不爲六塵所惑卽合道品八種之定
是名禪度調伏諸根知六塵無常苦空寂滅卽合道
品十種之慧是名智度調伏諸根也此乃三藏調伏
諸根滿足六度復次知眼空不受眼色空不受色根
塵空故名常捨行乃至意空不受意法空不受法名
常捨行卽合道品除捨覺分是名檀度調伏諸根色
空不能傷眼空眼空不能傷色空乃至法空不得意

便意空不得法便卽合道品正語正業正命是名尸
度調服諸根又眼色空故則無違無順無忍不忍乃
至意法空故無違無順無忍不忍卽合道品四種之
念是名忍度調服諸根眼色常空無不空時如是習
應與般若相應乃至意法常空無不空時是名與般
若相應卽合道品八種精進是名進度調伏諸根眼
色空故不亂不味乃至意法空故不亂不味卽合道
品諸定是名禪度調伏諸根眼色空故不愚不智乃
至意法空故不愚不智卽合道品十種之智是名智
度調伏諸根此是通教調伏諸根滿足六度也若眼
色具十法界十法界各有果報勝劣不同各各修因

深淺有異因果無量不可窮盡除却無知分別法相
無所受著乃至意法具十法界分別無著卽合道品
除捨覺分是名檀度調伏諸根分別眼色乃至意法
無量相貌未曾差機傷他善根自亦不爲無量根塵
所傷卽合道品正業語命是名戒度調伏諸根又於
十界根塵若違若順其心不動安住假中能忍成道
事卽合道品諸念是名忍度調伏諸根又分別一切
根塵若起難心苦心亦不中退於生死有勇卽合道
品精進是名進度調伏諸根又分別一切根塵心不
壞亂不動不僻卽合道品諸定是名禪度調伏諸根
又分別一切相塵道種智力授藥當宜方便善巧亦

無染著卽合道品諸慧是名智度調伏諸根此則別
教調伏諸根滿足六度復次若如殃掘摩羅經云所
謂彼眼根於諸如來常具足無減修了了分明見者
彼是九法界眼根也於如來常者九界自謂各各非
真如來觀之卽佛法界無二無別無減修者觀諸眼
卽佛眼一心三諦圓因具足無有缺減也了了分明
見者照實爲了了照權爲分明三智一心中五眼具
足圓照名爲了了見佛性也見論圓證修論圓因又
具足修者觀於眼根捨二邊漏名爲檀眼根不爲二
邊所傷名爲尸眼根寂滅不爲二邊所動名爲羂提
眼根及識自然流入薩婆若海名爲精進觀眼實性

名爲上定以一切種智照眼中道名爲智慧是爲眼
根具足無減修無減故了了分明見眼法界乃至彼
意根於諸如來常具足無減修了了分明知於一一
根卽空卽假卽中三觀一心名無減修證慧眼法眼
佛眼一心中得名了了見皆如上說根旣如此塵亦
復然一切諸法亦復如是是爲圓教調伏諸根滿足
六度此則究竟調伏究竟滿足如是助道助究竟道
當知六度徧能調伏一切諸根也大品云施者受者
財物不可得故具足檀波羅蜜亡三事無所著正當
檀體應是具足者行於財法二施檀名具足事理二
圓自他俱益故名具足事則破其慳法而能捨財理

則破其慳心而能捨法二破二捨體用具足名波羅密也云何六度攝佛威儀佛以十力無畏不共法等爲威儀一心中修四道品名修佛威儀證佛眼佛智名得佛威儀今逐語便約道品明攝十力者若四種道品卽是四種四諦智決因果知生滅之集決受三界之苦斯有是處生滅之集若至無餘涅槃斯無是處若生滅之道能盡苦入涅槃斯有是處生滅之道若至三界斯無是處乃至無作之集通至變易斯有是處若通至無上涅槃無有是處若無作道滅通至一切種智斯有是處若通至二乘無有是處是四因果一心中知決判明斷名是處非處力故如來於

佛法中作師子吼獨我法中有四沙門果卽此義也
業報智力者知四種集是知業知苦是知報道滅亦
爾分別四種業報淺深不謬是二力也知禪定力者
四種道諦中八定分別深淺照了不差是三力也知
根欲性力者知過去苦集不同名根力知現在苦集
樂欲不同名欲力知未來苦集得失不同名性力是
四五六力也知至處道力者知四道諦所至之處是
七力也知宿命天眼力者照過去一世多世種性好
惡壽命長短名宿命力照未來生處好醜名天眼力
是名八九力也漏盡力者四種滅諦所證無漏心慧
等解脫也是一法門而有四種者如王密語智臣解

意佛說十力赴四種機不令小者謗大傷其功德不
令大者得小抑其善根彼彼獨聞各各獲利無謀權
巧故號能仁菩薩智臣深解密語知意在三藏卽問
生滅鄭重諮詢令有緣疾悟乃至知意在圓或頌無
作或問無作令他得解一音殊唱萬聽咸悅口密無
邊義不可盡上作四釋何足致疑耶問十力是佛威
儀初心云何能學云何能得荅大論云菩薩行般若
十力無畏不應住若佛於佛法無有過失是則應住
若菩薩無佛法何所論住釋云菩薩修佛功德多生
重著破此重心故言不應住又菩薩分得十力無畏
旣未究竟故不應住若爾前雖修而未得後語入位

何關初心若依華嚴十住品云菩薩因初發心得十
力分正念天子問法慧云初心大士修十力方便云
何知家非家出家學道云何方便修習梵行具十住
道速成菩提荅云菩薩先當分別十種之法謂三業
及佛法僧戒若身是梵行梵行渾濁八萬戶蟲若身
業是梵行四儀顧眄舉足下足若口是梵行音聲觸
心脣齒舌動若口業是梵行則是語言乃至戒是梵
行戒場十衆問清淨戒師白四羯磨剃髮乞食等皆
非梵行梵行爲在何處誰有梵行三世平等猶如虛
空是名方便又更修習增上十法所謂十力甚深無
量如是觀者得一切諸佛功德初發心時便成正

覺知一切法真實之性具足慧身不由他悟如此明
文豈非初心修證十力又地持云菩薩知如來藏聞
思前行修自性禪得入一切禪一切禪有三種一現
法樂現法樂故稱歡喜地二出生十力種性三摩拔
提及二乘除入三利益衆生禪也十住名聞慧十行
名思慧此聞思前以修自性入一切禪得具三法豈
非初心有修有證三據明矣道品六度卽是修佛十力宛
轉相攝皆如上說若修道品六度卽是修佛十力若
調伏諸根滿足六度卽是滿足十力住佛威儀無異
也十住毗婆沙云力名扶助氣力不可窮盡地持云
得勝堪能名爲力於十處悉如實離虛妄勝於魔自

行故名得勝能以方便利益衆生故言堪能然佛力
無量何止言十實是一智緣十事故言十此十化衆
生足舉十餘亦可知殃掘云十力是聲聞宗非摩訶
衍大乘有無量力此二釋彌顯四種十力意云何道
品攝四無所畏一切智無畏者卽是備知四種苦諦
爲他分別明示過患決定師子吼無微畏相無能難
言是法非法障道無畏者四種集謂障四道滅決定
師子吼無微畏相無能難言此非障道盡苦道無畏
者四種道諦能行是道得盡苦出世間決定師子吼
無微畏相無漏無畏者卽四種滅諦各有所證各有
所滅決定師子吼無微畏相道品無畏宛轉相攝若

修道品六度卽是修無畏住佛威儀也大論云內心具足名爲力外川無怯名無畏十住毗婆沙云一法名無畏云何言四於四事中無疑故名四佛應於一切法無畏云何但四舉大要開事端餘亦無畏也攝十八不共法者初身口無失此二是四種道品正業語命也得供不高逢毀不下名無不定心四威儀恒在定名無不知已捨此二法是四種道品中八種定也修身戒心慧不可盡名欲無減慈悲度人安住寂滅不增不減名精進無減無量劫爲一切衆生受苦不疲不厭名念無減此三法是四種道品中八種精進也常照三世衆生心不須臾觀而爲說法不失先

念名慧無減憶三世事不忘名解脫無減自然覺悟
不同二乘名解脫知見無減一切身業智慧爲本得
無礙智說不可盡名身業共智慧行口意共智慧亦
如是凡十一法是四種道品中十種之慧結成攝法
意如上說攝四無礙智者法無礙是四種四諦名字
之法名字從心分別若無心者誰爲作名旣達一心
無量心亦知一名無量名名不可盡是名法無礙義
無礙者諸法諸名皆歸一義所謂如實義名義無礙
辭無礙者十法界衆生言辭不同皆悉解了十界音
辭入一音辭知一界卽解十界無有罣礙名辭無礙
又法是四諦法門義是四種道諦辭是四種苦諦云云

樂說無礙者以四種四諦巧赴機緣旋轉交絡說不可盡今他樂聞於一字中說一切字一切義赴一切音當其根性各沾利益結攝意如上說攝六通者眼耳如意三通如調伏諸根中說他心宿命漏盡如十力中說攝三明者如六通中說攝四攝者若怖施攝卽四種道品中除捨覺分也愛語卽四種道品中正業語命也利行同事卽四種道品八定定有神力故能利行同事云攝陀羅尼者持諸善法如完器盛水遮諸惡法如棘援防果卽是四種道品中四正勤勤遮二惡勤生二善故十住毗婆沙偈云

斷已生惡法 猶如除毒蛇 斷未生惡法

如預防流水

增長已生善

如溉其果栽

未生善爲生

如鑽木出火

攝三十二相者婆沙云阿毗曇相品中一一相三種分別謂相體相業相果也大論云百劫種三十二相卽其義也還用三藏道品六度望之終不出施戒慧等文煩不委攝意可知若通教相體業果者不同上也若以相求佛轉輪聖王卽是如來是人行邪道佛說三十二相卽非三十二相一一悉用空心蕩淨與空相應乃名爲相也毗婆沙亦云菩薩一心修習三十二相業皆以慧爲本卽空慧也若爾三十二相皆爲道品十慧及智度所攝卽通教意也復次前兩道

品教門明因得修相業論果得有相體但此相小勝
輪王魔能化作故非奇特入無餘涅槃相則永滅譬
如得銅不能照面二乘共三藏佛俱得真無法界像
常知前兩道品非修相法若後兩道品是修相法法
華云深達罪福相徧照於十方微妙淨法身具相三
十二若證中道中道卽具此相如法華中二乘開示
悟入妙會中道卽與八相佛記譬如得鏡萬像必形
大乘得中靡所不現法身相者名爲真相淨名云已
捨世間所有相好輪王魔羅世相嚴身皆是虛妄故
言已捨中道明鏡本無諸相無相而相者妍醜由彼
多少住緣普現色身卽真相也無量壽觀云阿彌陀

佛八萬四千相一一相八萬四千好薩遮華嚴皆云
相爲大相海好爲小相海旣言相海豈局三十二耶
爲緣不同多少在彼此真實之相爲別圓兩道品所
攝義自可知不能委記當知六度助道攝諸善法無
量無邊舉上十二條以示義端知餘亦攝助道尚爾
何況正道云○第八明次位者夫真似二位有解脫
知見朱紫分明終不謬謂未得謂得計四善根以爲
初果初果爲無學自知所斷證未斷證雖四門名位
有殊斷及諦理孱然不異二乘多論一生斷結時節
旣促教門所明大同小異不過迭動菩薩教門非但
時長行遠智斷亦別徑路乃殊歸途一也六度初僧

祇未知作佛二僧祇知而不說三僧祇自知亦說百
劫種大人相具五功德名不退地皆似位也坐道場
成佛方名真位此教初淺尚有次位豈有凡夫造心
卽言上位此非增上慢推與誰乎通教二乘真似之
位智異三藏斷位不殊若菩薩位條然不同簡名義
通別如法華玄云別教惑斷智位二乘聾啞非其境
界故名爲別一往望攝論華嚴所明地位卽是其義
但別義多途赴機異說橫則四門不同豎則階降深
淺不可定執一經而相是非又菩薩或造通論釋經
或造別論釋經如龍樹作千部論天親及諸菩薩論
復何量度此者少那得苦專一意非撥餘門若苟且

抑揚失佛方便自招毀損欲望通塗翻成哽塞今明
別位四門異說種種不同雖阡陌經緯其致一也此
方雖未有多論而前四門推之若通教說種種位知
其同是真諦別教說種種位知其同是中道經言雖
說種種道其實爲一乘其所說法皆悉到於一切智
地得此意者狐疑易息鬪諍不生上破思假中已畧
說諸位若欲知者往彼尋看云又今有十意融通佛
法一明道理寂絕亡離不可思議卽是四諦三二一
無隨情智等或開或合若識此意權實道理冷然自
照二教門綱格匡骨盤峙包括密露涇渭大小卽是
漸頓不定祕密藏通別圓若得此意聲教開合化道

可知三經論矛盾言義相乖不可以情通不可以博
解古來執諍連代不消若得四悉檀意則結滯開融
懷抱瑯析技擲自在不惑此疑彼也四若知謬執而
生塞著巧破盡淨單複具足無言窮逐能破如所破
有何所得耶五結正法門對當行位修有方便證有
階差權實大小賢聖不濫增上慢罪從何而生六於
一法門縱橫無礙綸緒次第疊疊成章七開章科段
鉤鐔相承生起可愛八帖釋經文婉轉繡媚總用上
諸方法隨語消釋義順而文當九翻譯梵漢名數兼
通使方言不壅十一一句偈如聞而修入心成觀觀
與經合觀則有印印心作觀非數他寶唯翻譯名數

未暇廣尋九意不與世間文字法師共亦不與事相
禪師共一種禪師唯有觀心一意或淺或僞餘九全
無此非虛言後賢有眼者當證知也次位者十意之
一也若圓教次位者於菩薩境中應廣分別但彼證
今修故須畧辯若四種三昧修習方便通如上說唯
法華別約六時五悔重作方便今就五悔明其位相
先知逆順十心而繫緣實相是第一懺常懺悔無不
懺時但心理微密觀用輕疎黑惡覆障卒難開曉重
運身口助發意業使疾相應更加五悔耳懺名陳露
先惡悔名改往修來佛智徧照佛慈普攝我以身口
投佛足下願世間眼證我懺悔我無始無量遮佛道

罪無明所偪不識正真從三界繫動身口意起十惡
罪三寶六親四生五道作不饒益事破發三乘心人
造五七逆自作教他見作隨喜應現生後受諸苦惱
如三世菩薩求佛道時懺悔我亦如是傷已昏沉無
智慧眼發是語時聲淚俱下至誠真實五體投地如
樹崩倒摧折我人衆惡傾殄是名懺悔勸請者名爲
祈求聲聞自度直懺已罪菩薩愍衆故行道故須勸
請我今知罪尚不得脫衆生不知歷劫流轉我無力
救請十方佛佛愍衆生不簡巨細必冀從願大論明
請不請云請轉法輪謂勸示證令於四諦生眼智明
覺是名三轉有人言請說三乘名三轉佛若說法衆

生得涅槃證設未得者且令受世間樂佛若普許則一切得安我預一切罪苦亦除如徧請雨我有少田自沾甘潤請住世者夫命隨業得住變化隨心得住心止化滅我今請佛饒益衆生如大炬火莫止變化之心久住安隱度脫一切是名勸請隨喜者名爲慶彼佛旣三轉法輪衆生得三世利益我助彼喜又我應勸化令其生善其善自生是故我喜喜三世衆生福德善三世三乘無漏善三世諸佛從初心至入滅一切諸善我皆隨喜亦教他喜如買賣香傍觀三人同熏能化受化及隨喜者三善均等觀衆生惑甚可悲傷觀衆生善應大恭敬心常不輕深知衆生具正

緣了卽雖未發會必應生毒鼓遠近爲要當死故敬
之如佛何者未來諸世尊其數無有量也此深是隨
喜意也法華隨喜法大品隨喜人人法互舉耳迴向
者迴衆善向菩提一切賢聖功德廣大我今隨喜福
亦廣大衆生無善我以善施施衆生已正向菩提如
迴聲入角響聞則遠迴向爲大利正迴向者斷三界
道滅諸戲論乾煩惱泥滅棘刺林捨除重擔不取不
念不見不得不分別能迴向者所迴向處諸法皆妄
想和合故有一切法實不生無已今當生無已今當
滅諸法如是我順諸法隨喜迴向如三世諸佛所知
所見所許是名真實正迴向亦名最上具足大迴向

則不謗佛無過咎無所繫無毒無失何但迴向如此
前三後一亦然毗婆沙云罪應如是懺勸請隨喜福
迴向於菩提發願者誓也如許人物若不分券物則
不定施衆生善若不要心或恐退悔加之以誓又無
誓願如牛無御不知所趣願來持行將至所在亦名
陀羅尼持善遮惡如坯得火堪可盛物二乘生盡故
不須願菩薩生生化物須總願別願四弘是總願法
藏華嚴所說一一善行陀羅尼皆有別願今於道場
日夜六時行此懺悔破大惡業罪勸請破謗法罪隨
喜破嫉妒罪迴向破爲諸有罪順空無相願所得功
德不可限量譬筭校計亦不能說若能勤行五悔方

便助開觀門一心三諦豁爾開明如臨淨鏡徧了諸色於一念中圓解成就不加功力住運分明正信堅固無能移動此名深信隨喜心卽初品弟子位也分別功德品云其有衆生聞佛壽長遠乃至能生一念信解所得功德不可限量能起如來無上之慧若聞是經而不毀些起隨喜心當知已爲深信解相卽初品文也又以圓解觀心修行五悔更加讀誦善言妙義與心相會如膏助火是時心觀益明名第二品也文云何況讀誦受持之者斯人則爲頂戴如來又以增品勝心修行五悔更加說法轉其內解導利前人以曠濟故化功歸已心更一轉倍勝於前名第三品

也文云若有受持讀誦爲他人說自書教人書供養
經卷不須復起塔寺供養衆僧又以增進心修行五
悔兼修六度福德力故倍助觀心更一重深進名第
四品也文云況復有人能持是經兼行六度其德最
勝無量無邊譬如虛空至一切種智又以此心修行
五悔正修六度自行化他事理具足心觀無礙轉勝
於前不可比喻名第五品也文云能爲他人種種解
說清淨持戒忍辱無瞋常貴坐禪精進勇猛利根智
慧當知是人已趣道場定三菩提若爾五品之位
在十信前若以普賢觀卽以五品爲十信五心但佛意
難知赴機異說借此開解何勞苦諍云復次今此一

章是觀陰界入境須約陰入而判次位所謂黑陰入
界卽三惡道位白陰入界卽三善道位善方便陰入
界卽小乘似位無漏陰界入卽二乘真位變易陰界
入卽五種人位法性常色常受想行識陰界入卽佛
位云又假名五品旣轉明淨豁入聞慧通達無滯深
信難動卽信心也如此次第念進慧定陀羅尼戒護
迴向願等十信具足名六根清淨相侶之位四住已
盡仁王般若云十善菩薩發大心長別三界苦輪海
卽此意也次入初住破無明見佛性華嚴云初發心
時便成正覺真實之性不由他悟卽此意也如是次
第四十二位究竟妙覺無有叨濫是名知次位○第

九安忍者能忍成道事不動亦不退是心名薩埵始
觀陰界至識次位八法障轉慧開或未入品或入初
品神智爽利若鋒刃飛霜觸物斯斷初心聰敏有逾
於此本不聽學能解經論覽他義疏洞識宗塗欲釋
一條辯不可盡若懷寶藏壁蘊解匿名密勤精進必
得入品或進深品志念堅固無能移易彌爲勝術但
雖不處囊難覆易露或見講者不稱理或見行道者
不當轍慈悲示語卽被圍遶凡令講說或勸爲衆生
內痒外動卽說一兩句法或示一兩節禪初對一人
馳傳漸廣則不得止初謂有益益他蓋微廢損自行
非唯品秩不進障道還興象子力微身沒刀箭掬湯

投冰翻添冰聚毗婆沙云破敗菩薩也昔鄴洛禪師
名播河海住則四方雲仰去則千百成羣隱隱轟轟
亦有何益利臨終皆悔武津歎曰一生望入銅輪領
衆太早所求不克著願文云擇擇擇擇高勝垂軌可
以鏡焉修行至此審自斟酌智力強盛須廣利益如
大象押羣若其不然且當安忍深修三昧行成力著
爲化不晚大論云菩薩以度人爲事云何深山自善
荅曰如服藥將身體康復業身雖遠離心不遠離若
至六根清淨名初依人有所說法亦可信受一音徧
滿聞者歡喜是化他位也若此時不出強輒兩賊無
如之何自行轉成於他有辦大象捍格刀箭無施日

光照世長冰自治此卽安忍之力焉若被名譽羅罣
利養毛繩眷屬集樹妨蠹內侵枝葉外盡者當早推
之莫受莫著推若不去翻被黏繫者當縮德露玼掇
狂隱實密覆金貝莫令盜見若遁迹不脫當一舉萬
里絕域他方無相諳練快得學道如求那跋摩云若
名利眷屬從外來破憶此三術齧齒忍耐雖千萬請
確乎難拔讓哉隱哉去哉若煩惱業定見慢等從內
來破者亦憶三術卽空卽假卽中設使屠粉肌肉心
不動散大地鎮壓不爲重淪毗嵐弗輕寒冰非冷猛
炎寧熱端心正觀那得薄證片禪卽以爲喜纔見少
惡卽以爲憂坏器易埴菴華難實大品云無量人發

菩提心多墮二乘地爲辦大事彌須安忍若得此意
不須九境若未了者當更廣明○第十無法愛者行
上九事過內外障應得入真而不入者以法愛住著
而不得前毗曇云煖法猶退五根若立上忍發真則
不論退頂法若生愛心應入不入退爲四重五逆通
別皆有頂墮之義既不入位又不墮二乘大論云三
昧是似道位未發真時喜有法愛名爲頂墮今人
行道萬不至此至此善自防護此位無內外障唯有
法愛法愛難斷若有稽留此非小事譬如同帆一去
一停停卽住著又雖不著沙亦不著岸風息故住不
著沙喻無內障岸喻外障而生法愛無住風息不進

不退名爲頂墮若破法愛入三解脱發真中道所有
慧身不由他悟自然流入薩婆若海住無生忍亦名
寂滅忍以首楞嚴遊戲神通具大智慧如大海水所
有功德唯佛能知今止觀進趣方便齊此而已入住
功德今無所論後當重辨○是十種法名大乘觀學
是乘者名摩訶衍云何大乘如法華云各賜諸子等
一大車其車高廣衆寶莊校周匝欄楯四面懸鈴又
於其上張設幃蓋亦以珍奇雜寶而嚴飾之寶繩交
絡垂諸華纓重敷綽筵安置丹枕駕以白牛肥壯多
力膚色充絜形體姝好有大筋力行步平正其疾如
風入多僕從而侍衛之止觀大乘亦如是觀念念心

無非法性實相是名等一大車於一一心卽空卽假
卽中是名各賜大車徹三諦之源名爲高收十法界
名爲廣無量道品名衆寶莊校四勤遮惡持善又顯
來持行釘鑷牢固名周巾欄楯法義辭辯宣暢開覺
名四面懸鈴慈悲普覆無有遺限名張設幘蓋道品
所攝十力無畏十八不共之法不與他共名珍奇嚴
飾四弘誓願要心不退名寶繩交絡四攝攝物物無
不悅名垂諸華纓諸禪三昧起六神通名重敷統筵
四門歸宗休息諸行名安置丹枕四念處慧破除八
倒之黑名駕以白牛四正勤增長二善名肥壯多力
遮斷二惡二惡盡淨故言膚色充絜四如意足四辯

自在名形體姝好五根盤固不可移動名爲筋五力
增長遮諸惡法名爲力七覺簡擇名爲行步八道安
隱名爲平正對治助道廣攝諸法名又多僕從而侍
衛之破法愛無明入薩婆若海發真速疾名其疾如
風運載諸子嬉戲快樂此大乘觀法門具度與彼經
合故名大乘觀也復次一切法悉一乘故夫有心者
無不具足如此妙法是名理乘如來不說則不能知
以聞教歡喜頂受卽名字乘因聞名故依教修行入
五品位名觀行乘得六根清淨名相似乘從三界出
到薩婆若中住是亦不住若入初住乃至十住得真
實乘遊於東方十行遊南方十向遊西方十地遊非

方輪環無際得空而止止於中央卽妙覺直至道場
是此意也今人祇謂捨惡取空是大乘此空尚不免
六十二見單複之惡何得動出爲乘設借爲乘祇一
禿乘無法門具度正法大城金剛寶藏具足無缺何
所而無豈容禿空而已若但爾者乘邪見乘入險惡
道是壞驢車耳云○端坐觀陰入如上說歷緣對境
觀陰界者緣謂六作境謂六塵大論云於緣生作者
於塵生受者如隨自意中說若般舟常行法華方等
半行或掃灑執作皆有行動隨自意最多若不於行
中習觀云何速與道理相應畧辨其相例前爲十初
所觀境者若舉足下足足是色法色由心運從此至

彼此心依色卽是色陰領受此行卽受陰於行計我卽想陰或善行惡行卽行陰行中之心卽識陰行塵對意則有界人乃至眼色意法亦如是是陰界入於舉下聞悉皆具足如此陰入卽是無明與行緣合生行中陰界入陰界入不異無明無明卽是法性法性卽是法界一切法趣行中是趣不過一陰界入一切陰界入一多不一不多不相妨礙是名行中不思議境達此境時與慈悲俱起傷已昏沉無量劫來常爲陰入迷惑欺誑今始覺知一切衆生悉是一乘昏醉倒解甚可憐愍誓破無明作衆依止安心定慧而寂照之心旣得安徧破見思無知無明三諦之障橫豎

皆盡又善識通塞終不於中取藥成病善知道品榮
枯念處雙樹中間入般涅槃又善知行中對治六度
助開涅槃門深識次位知我此行未同上聖慙愧進
修無有休已能於行中外降名利內伏三障安忍不
動法愛滯著莫領頂墮十法成就卽入銅輪證無生
忍得一大車高廣嚴淨衆寶莊校其疾如風嬉戲快
樂乘是寶乘直至道場是約行緣作觀治無明糠顯
法性米舉足下足道場中來具足佛法矣例前可知
行緣旣爾住坐臥語作例前可解三三昧無臥法隨
自意則有昔國王於臥中悟辟支佛當知臥中得有
觀行

云

對境者約眼計我言我能受一塵有三合十

八受者眼見色有五陰三界二入例如上說又彌勒相骨經云一念見色有三百億五陰生滅一一五陰卽是衆生若爾者眼對色時何啻五陰三界二入若如此觀眼色者名爲減修非摩訶衍若觀眼色於諸如來常具足無減修明識來入門者眼色一念心起卽是法界具一切法卽空卽假卽中四句求不可得故言卽空如彌勒相色一念三百億五陰生滅乃至一地十地相色旣爾受想行識亦復如是又外道打觸體作聲聽知生處知無量事香味觸等亦復如是故言卽假假不定假空不定空則非空非假若眼一法非空非假則一切法非空非假猶如虛空有無永

寂亦如日月無幽不照雖無空假雙照空假照因緣
麤色名肉眼照因緣細色名天眼照因緣色空名慧
眼照因緣色假名法眼照因緣色中名佛眼五眼一
心中具者非具凡夫膿血肉眼亦非諸天所得天眼
亦非二乘沈空慧眼亦非菩薩分別之眼但以佛眼
具有五力如衆流入海失本名字故佛問善吉云如
來有五眼不荅云有皆稱如來有何關凡夫二乘眼
耶請觀音云五眼具足成菩提以三觀一心名無減
修以一眼具五力名明見來入門亦是圓證也於眼
內外自在眼入正受鼻三昧起鼻入眼起雖動而寂
寂不妨動雖寂而動動不妨寂雖見不見不見而見

乃稱明見來入門也問佛具五眼應照五境經云我以五眼不見三聚衆生狂愚無目而言見耶又云見色與盲等既等於盲那得見麤細色荅五境皆冥實相實相則不可見不可見故喻之如盲雖不可見見無減少五眼洞徹諸境分明雖言五照照何必有雖言如盲盲何必無淨名云不來相而來不見相而見卽此意也是爲不思議境我眼衆生眼無二無別云何衆生不覺不知卽起慈悲誓當度脫欲滿此願安心定慧能以止觀徧破諸法於眼色中明識通塞不如蟲道於眼陰中修四念處非淨非不淨枯榮雙遣而入涅槃學諸對治助開三脫明識六卽不起叨溢

我所觀眼雖具五眼但是名字但是觀行若漸見障
外後見十方如普賢觀頓見大千如常不輕漸頓兩
見六根互用我悉未階不應起慢慙愧勤行若德建
名立當忍內外障安若須彌法愛不生則無留滯其
疾如風證真實眼乘一大車直至道場若眼中得入
多於眼中廣作佛事常放金光照耀一切淨名云或
有佛土以光明爲佛事眼色一受旣爾餘二受亦然
餘五根五塵十五受亦然廣說如前將前意度入六
根用之但令破煩惱去不拘常科若從耳中得大車
多用音聲爲佛事鼻中用香舌中用味身中用天衣
意中用寂滅一根佛事互通諸根方便利物時或不

同而令衆生得究竟樂

云

○若能如上勤而行之於

一生中必不空過雖聞不用如黑蛇懷珠何益於長
蛇者乎今以三譬譬於得失匹夫隻勇修治一刀一
箭破一寇兩寇獲賜一金一銀祿潤一妻一子如此
之人但利器械負戟前驅以命博貨何用廣知兵法
耶若欲爲國翹蘖舟楫鹽梅霖雨者須善文武計在
帷帳折衝萬里所學處深所破亦大獲賞旣重祿潤
甚多雖知而不用用而屢北尙不能濟身澤豈及人
乎學禪觀者亦如是唯知一法或止或觀擬破少惡
寂心行道得少禪定攝少眷屬便以爲足如匹夫鬪
耳欲作大禪師破大煩惱顯無量善法益無量緣當

學十法止觀洞達意趣於六緣六受行用相應煩惱
卒起卽便有觀觀過惑表勇健難事解髻得珠若解
而不用用而不當而反師惑心道安克乎又如野巫
唯解一術方救一人獲一脯梓何須學神農本草耶
欲爲大醫徧覽衆治廣療諸疾轉脈轉精數用數驗
恩救博也學禪者亦如是但專一法治惑卽去當時
微益終非大途包括之意亦不能破煩惱入無生忍
雖善醫藥不依方服病豈差乎讀誦止觀甚利心不
行用無生終不現前又如學義止欲一問一荅銜耀
一時何須廣尋經論欲作法主當善異部雖諳解處
多而不曾出衆怯弱不任酬徃若無怯怖臨機百轉

以無方之荅荅縱橫之問是爲大法師觀行人亦如是觀行若明能歷緣對境觸處得用若不如是魔軍何由可破煩惱重病何由可除法性深義何由可顯三事不辦區區困役祇是生死凡夫非爲學道方便也

摩訶止觀卷第七下